



# Uhvaćen sa 665 kg skanka

Vrijednost zaplijenjene droge u Neumu procjenjena na oko osam miliona KM

**AMRA BRKIĆ-ČEKIĆ**

Rekordnih 665 kilograma modifikovane marihuane skank, čija se vrijednost procjenjuje na skoro osam miliona maraka pronađena je u okviru akcije Petrol Line koju su u Neumu izveli pripadnici **SIPA**. Droga je nađena prilikom pretresa kamiona cisterne dubrovačkih registarskih oznaka kojim je upravljao muškarac iz Metkovića.

Iako će detalji biti poznati u

narednom periodu, nezvanično smo saznali da je ovaj kamion poslednjih dana često putovao iz Hrvatske u BiH i Crnu Goru zbog čega je bio sumnjiv. Marihuana, koja je kako se sumnja bila namijenjena zapadnom narko-tržištu, oduzeta je i bit će predmet vještačenja. Osumnjičeni će danas biti saslušan u Tužilaštvu BiH, nakon čega će biti odlučeno o daljim mjerama. / STR 21.

# Skank danima prevezio u cisterni

Pripadnici **SIPA** su u akciji Petrol Line uhapsili muškarca iz Metkovića koji će danas biti predat Tužilaštvu

Pripadnici **Agencije za istrage i zaštitu BiH (SIPA)** preksinoć su u akciji nazvanoj Petrol Line uhapsili muškarca porijeklom iz Metkovića zbog sumnje da je u cisterni, dubrovačkih registarskih oznaka, prevezio 665 kilograma skanka. Njemu je na teret stavljeno da je počinio krivično djelo neovlašteni promet opojnim drogama.

## Saslušanje

Osumnjičeni je priveden u prostorije **SIPA**, gdje će biti ispitan, a nakon toga će biti predat Tužilaštvu BiH, gdje će postupajući tužilac odlučiti o daljim mjerama. Predmet istrage Tužilaštva BiH je i da se utvrdi ko je sve osim osumnjičenog učestvovao u švercu skanka te koliko je tačno droge osumnjičeni prevezao do sada.

Akcija hapšenja uslijedila je nakon višednevnog praćenja osumnjičenog. Naime, osumnjičeni je posljednjih dana često istim kamionom-cisternom putovao iz Hrvatske u BiH i Crnu Goru. Na kamionu je bila oznaka za prevoz opasnih stvari.



Kako je jučer saopćeno iz dubrovačko-neretvanske policije, kamion je u vlasništvu firme iz Metkovića, a na meti praćenja policije se našao nakon učestalih prelaza na granici.

- Prema našim evidencijama, u četvrtak je oko 1.40 sati išao za Crnu Goru pun goriva, a vratio se u 17 sati, kazala je za hrvatske medije portparol PU DN Davorka Bečić.

Saopćeno je i to da su kod osumnjičenog prilikom pretresa pronađena i tri mobitela, dok je droga bila zapakovana u 89 vreća u kojima se nalazilo po sedam komada canabisa.

## Vrijednost

Inače, u Sarajevu se jedan paketić od šest grama skanka prodaje za 10 KM. Prema riječima penzionisanog inspektora Odjeljenja za borbu protiv narkomanije MUP-a KS-a Džemala Murge, od te količine se mogu napraviti tri džointa.

- Cijena kilograma na veliko je 6.000 KM, tako da se običnom računom dođe do podatka da je ulična vrijednost zaplijenjenog skanka oko četiri miliona KM, dok bi zarada od ovoga bila najmanje dupla, dakle, osam miliona KM, objašnjava Murga i dodaje da je droga skank, koju često zovu i albanka, pet puta bolja od "obične trave, odnosno obične marihuane".

**A. B. Č.**